

▽
0227.6

043

8

駢志卷之十

一集

海虞陳禹謨錫玄甫輯

戊部下

張平子造地動儀

陶弘景造渾天象

後漢書張衡字平子造候風地動儀以精銅鑄成員徑八尺合蓋隆起形似酒尊飾以篆文山龜鳥獸之形中有都柱傍行八道施關發機外有八龍首銜銅丸下有蟾蜍張口承之其牙機巧制皆隱在尊中覆蓋周密無際如有地動尊則振龍機發吐丸而蟾蜍銜之振聲激揚伺者因此覺知雖一龍發機而七首不動尋其方面

乃知震之所在驗之以事合契若神自書典所記未之有也嘗一龍機發而地不覺動京師學者咸怪其無徵後數日驛至果地震隴西于是皆服其妙

南史陶弘景造渾天象高三尺許地居中央天轉而地不動以機動之悉與天相會云 又舊唐書李淳風造

渾天儀其制以銅爲之表裏三重下據準基狀如十字末樹鰲足以張四表焉第一儀名曰六合儀有天經雙規渾緯規金常規相結于四極之內備二十八宿十二辰經緯三百六十五度第二名三辰儀圓徑八尺有璿璣規道月遊天宿矩度七曜所行並備于此轉于六合之內第三名四遊儀玄樞爲軸以連結玉衡遊甬

而貫約規矩又玄樞北樹北辰南距地軸傍轉于內又玉衡在玄樞之間而南北遊仰以觀天之辰宿下以識器之晷度時稱其妙

客星掩帝座

客星犯天子

幽明錄漢武帝嘗微行造主人家仍畱宿夜與主婢臥有一書生亦寄宿善天文忽見客星將掩帝座甚逼書生驚呼咄咄不覺聲高又見一男子操刀將入戶聞書生聲急遂縮走客星應時而退如此者數過帝異而問之書生具說所見帝乃悟曰必此人壻也將欲肆凶惡于朕乃語主人召集期門羽林擒奴問而款服乃誅之

帝嘆曰斯蓋天啟書生以扶祐朕躬乃厚賜書生

會稽典錄嚴遵字子陵與世祖俱受業長安建武五年
下詔徵遵設樂陽明殿命宴會暮畱宿遵以足荷上其
夜客星犯天子宿明旦太史以聞上曰此無異也昨夜
與嚴子陵俱卧耳

吹笛止雨

吹律煖谷

周穆王時天下連雨三月穆王乃吹笛其雨遂止也

劉向別錄方士傳言鄒衍在燕燕有谷地美而寒不生
穀鄒子居之吹律而溫氣至而穀生今名黍谷

引氣飛雪

卽席爲炎

拾遺記周靈王登昆昭之臺忽見二人乘雲而至一人
先唱能爲雪霜引氣一噴則雲起雪飛坐者皆凜然官
中池井堅冰可琢

又云周靈王冬設狐腋素裘紫羅文褥羅褥是西域所
獻也施於臺上坐者皆溫又有一人唱能使卽席爲炎
乃以指彈席上而暄風入室裘褥皆棄於臺上

祈禱分風

動搖起雨

荊州記官亭湖廟神甚有靈驗塗旅經過無不祈禱能
使湖中分風而帆南北

又云南康有平湖湖中鴈底浮在湖中動搖便起風雨

喫酒

漱水

邵氏家傳邵信臣爲少府南陽遭火焚數萬人信臣時在丞相匡衡坐心動含酒東向喫之遭火處見雲西北東冥晦大雨以滅火雨酒香 又後漢書郭憲從駕喫酒厭齊國火 神僊傳成武丁于周昕坐喫酒救臨武後漢書樊英隱于壺山嘗有暴風從西方起英謂學者曰成都市火甚盛因含水西向漱之乃令記其時日客後有從蜀來云是日大火有黑雲從東起須臾大雨火遂得滅

樂巴滅成都之火雨皆酒臭

澄公滅幽州之火雨有酒氣

神僊傳樂巴爲尚書正朝大會巴後到又飲酒西南喫之詔問謝曰臣本縣成都市失火臣故因酒爲雨以滅火後驛書問成都果然正旦失火有雨從東北來乃息雨皆酒臭

晉書佛圖澄嘗與石季龍升中臺忽曰幽州當火災仍取酒喫之曰救已得矣後遣驗之云是日火起西南驟雨滅之雨亦頗有酒氣

市中耗瓜

坐上種瓜

搜神記徐光常行幻術于市里從人乞瓜其主弗與便從索辨種之俄而瓜生蔓延成花實乃取食之因賜觀者鬻者反視所賣皆耗矣

續僊傳馬湘有道術嘗于江南刺史馬植坐上冬月以酒杯盛土種瓜須臾引蔓花實食之甚美

許元長致榴

董元素致柑

劇談錄唐武宗時術士金陵許元長善變幻武宗謂之曰先朝明崇儼取羅浮山柑子萬里往來止于旬日東都當進石榴時已熟矣卿今日當致十顆元長奉詔而出及旦寢殿始開金盤貯石榴致于御榻俄有使奉進亦以所失之數上聞

異聞集唐宣宗朝有術者董元素自江南來上召見與語曰聞君頗有神術今南中柑橘正熟卿能致之否元素對曰請安一合于御榻前數刻時有微風入簾元素乃啓其合柑子滿其中奏曰此江陵枝江縣柑也遠處恐遲上嘗之驚嘆

黃公能制虎後爲虎所殺
長房能管鬼後爲鬼所殺

西京雜記東海人黃公能制龍御虎佩赤金刀以絳繒束髮立興雲霧坐成山河及衰老不能復行其術秦末有白虎見于東海黃公乃以赤刀往厭之術旣不行遂

爲虎所殺

後漢費長房遇老翁爲作符曰以此主地上鬼神遂能鞭笞百鬼及驅使社公或在它坐獨自恚怒人問其故曰吾責鬼魅之犯法者耳後失其符爲衆鬼所殺

參龍

呪龍

中朝故事古有參龍氏長安有參龍戶觀水卽知龍色其有無悉知之懿皇朝龍戶上言龍池中走失兩條往關東尋訪數十日東都魏王池中見之取而歸闕縱華州時李訥爲華州刺史大以爲虛妄命就公俯視之則于一小瓶子中倒于盆內乃二細鰍魚也訥怒目曰何

以爲驗對曰驗非難也請鑿穴尺許注水其間收鰍投水相趣旋轉尾觸穴四隅隨觸而陷水亦暴漲逡巡穴已闊數尺其人諮訥云恐穴更廣卽難制也遂搦入瓶中訥方奇之厚贈錢帛攜歸輦下

抱朴子西域方士能神呪者臨淵禹步吹氣龍卽出浮其初出乃長十數丈于是方士更吹之一吹則龍輒一縮至長數寸掇取著壺中或有四五龍以少水養之物塞壺口聞有旱處便賣龍往賣之一龍直數十斤金舉國會歛以顧之直畢乃發壺出一龍著淵潭之中因復禹步吹之輒一吹一出長數十丈須臾雲雨四集

沉符蛟死

馬志
施符蛇死

潯陽記潯陽城東門通大橋常有蛟爲百姓害董奉疏符沉水中少間見一蛟死浮出

廣州記晉興郡路側五六里有一物大百圍長數十丈行者過視則往而不反積年如此失人甚多董奉從交州出由此嶠見之大驚云此蛇也住行旅施符救經宿往看蛇已死矣左右白骨積聚成山

少翁言能致其神

巫者言貴妃可致

漢書李夫人妙麗善舞得幸于武帝及卒上憐憫焉圖畫其形于甘泉宮上思念不已方士齊人少翁言能致

其神乃夜張燈燭設幃帳陳酒肉令上居他帳遙望見好女如李夫人之貌還幄坐而步又不得就視上愈益相思悲感爲作詩曰是邪非邪立而望之偏何姍姍其來遲令樂府諸音家弦歌之上又自爲作賦以傷悼人

南史殷淑儀南郡王義宣女帝密取之寵冠後宮假姓

殷氏及薨帝嘗思見之遂爲通替棺欲見輒引替觀屍如此積日形色不異時有巫者能見鬼說帝言貴妃可致帝大喜令召之有少頃果于帷中見形如生平帝欲與之言默然不對將執手奄然便歇帝尤哽恨于是擬

李夫人賦以寄意焉

按陳鴻長恨傳玄宗心念楊妃有道士自蜀來自言有李少君術玄

宗大喜命致其神與前二事正同其殷與楊並稱貴妃尤異

左慈引鱸魚

介象餌鮓魚

後漢書左慈字元放少有神道嘗在司空曹操坐操從

容顧衆賓曰今日高會珍羞畧備少吳松江鱸魚耳

神仙

傳云松江出好鱸魚味異它處

元放於下坐應曰此可得也因求銅盤

貯水以竹竿餌釣於盤中須臾引一鱸魚出操大拊掌

笑會者皆驚操曰一魚不周坐席可更得乎放乃更餌

釣沈之須臾復引出皆長三尺餘生鮮可愛操使目前

鱸之周浹會者操又謂曰旣已得魚恨無蜀中生姜耳

元放曰亦可得也操恐其卽近所取因曰吾前遣人到

蜀買錦可過勅使者增市二端語頃卽得薑還并獲操

使報命後操使蜀反驗問增錦之狀及時日早晚若符

契焉

葛洪神仙傳仙人介象字元則有諸方術吳主聞之徵

象到武昌甚敬貴之稱爲介君爲起宅以御帳給之賜

遺前後累千金從象學蔽形之術試還後宮及出殿門

莫有見者又使象作變化種瓜菜百果皆立生可食吳

主共論鱸魚何者最美象曰鮓魚爲上吳主曰論近道

魚耳此出海中安可得耶象曰可得耳乃令人於殿庭

中作方埴汲水滿之并求鉤象起餌之垂綸於埴中須

臾果得鮓魚吳主驚喜問象曰可食不象曰故爲陛下

取以作生鱸安敢取不可食之物乃使厨下切之吳主

曰聞蜀使來得蜀薑作壘甚好恨爾時無此象曰蜀薑豈不易得願差所使者可付直吳主指左右一人以錢五十付之象書一符以著青竹杖中使行人閉目騎杖杖止便買薑訖復閉目此人承其言騎杖須臾止已至成都不知是何處問人人言是蜀市中乃買薑于時吳使張溫先在蜀既於市中相識甚驚便作書寄其家此人買薑畢捉書召薑騎杖閉目須臾已還到吳厨下切鱠適了裴松之曰神仙之術詎可測量臣之臆斷以爲惑衆所謂夏蟲不知冷水耳

佛圖澄識鈴音

出道榮善洞視

晉書劉曜攻洛陽石勒將救之其群下咸諫以爲不可勒以訪佛圖澄澄曰相輪鈴音云秀支臂戾岡僕谷劬禿當此羯語也秀支軍也臂戾岡出也僕谷劉曜胡位也劬禿當捉也此言軍出捉得曜也又令一童子潔齋七日取麻油合臘脂躬自研于掌中舉手示童子粲然有輝童子驚曰有軍馬甚衆見一人長大白皙以朱絲縛其肘澄曰此卽曜也勒甚悅遂赴洛距曜生擒之北史由吾道榮隱于琅瑯山中辟穀餌松朮茯苓求長生之祕又善洞視蕭軌等之敗于江南其日道榮言之如目見其後鄉人從役得歸者勘問敗時形勢與道榮所說符同

澄公以祝願脫黑略于羗圍

澄公以祝願護弟子于被劫

晉書郭黑略將兵征長安北山羌墮羌伏中時佛圖澄在堂上坐慘然改容曰郭公今有厄乃唱云衆僧祝願澄又自祝願有頃曰脫矣後月餘黑略還自說墮羌圍中東南走馬乏正遇帳下人推馬與之曰公乘此馬小人乘公馬濟與不濟命也略得其馬故獲免推檢時目正是澄祝願時也

又佛圖澄嘗遣弟子向西域市香旣行澄告餘弟子曰掌中見買香弟子在某處被劫垂死因燒香祝願遙救護之弟子後還云某月某日某處爲賊所劫垂當見殺忽聞香氣賊無故自驚曰救兵已至棄之而走

聖水

聖火

唐書汴宋觀察使令狐楚言亳州聖水出飲者疾輒愈裴度判曰妖由人興水不自作命在所禁塞又李德裕傳云聖水獲利人轉相惑德裕在浙西命于大市集人置釜取其水令取猪肉五斤煮云若聖水也肉當如故逡巡肉熟爛自此人心稍定妖者尋而敗露

南史齊世祖時魏地謠言赤火南流喪南國是歲有沙門從北齋此火而至色赤于常火而微云以療疾貴賤爭取之多得其驗二十餘日都下大盛咸云聖火詔禁

之不止火炙至七炷而疾愈吳興丘國賓密以還鄉邑人楊道慶虛疾二十年依法炙卽差

神僊之術誕哉

黃白之儔詭哉

申鑒或問神僊之術曰誕哉末之也已矣聖人弗學非惡生也終始運也短長數也運數非人力之爲也曰亦有僊人乎曰僬僥桂莽產乎異俗就有僊人亦殊艱矣按詩含神霧曰從中州以東西四十萬里得僬僥國

人長一尺五寸也

又或問黃白之儔曰傳毅論之當也燔埴爲瓦則可爍瓦爲銅則不可以自然驗于不然詭哉敵犬羊之肉以造馬牛不幾矣不其然歟

龜陰故數偶

著陽故數奇

禮三正記曰天子龜長一尺二寸諸侯一尺大夫八寸士六寸龜陰故數偶也天子著長九尺諸侯七尺大夫五尺士三尺著陽故數奇也

非趙龜神而燕龜欺

非秦龜神而趙龜欺

韓非子鑿龜數筴兆曰大吉而以攻燕者趙也鑿龜數筴兆曰大吉而以攻趙者燕也劇辛之事燕無功而社稷危鄒衍之事燕無功而國道絕趙代先得意于燕後

得意于齊國亂飾高自以爲與秦提衡非趙龜神而燕
龜欺也趙又嘗鑿龜數筴而北伐燕將劫燕以逆秦兆
曰大吉始攻大梁而秦出上黨矣兵至釐而六城拔矣
至陽城秦拔鄴矣龐援前兵而南則障盡矣臣故曰趙
龜雖無遠見于燕且宜近見于秦秦以其大吉辟地有
實救燕有名趙以其大吉地削兵辱主不得意而死又
非秦龜神而趙龜欺也初時者魏數年東鄉攻盡陶衛
數年西鄉以失其國此非豐隆五行太乙王相攝提六
神五括天河殷搶歲星非數年在西也又非天缺弧逆
刑星熒惑奎台非數年在東也故曰龜筴鬼神不足舉
動左右背鄉不足以專戰然而恃之愚莫大焉

伐紂不信龜凶

伐越不信筮凶

論衡武王伐紂卜之而龜遭占者曰凶太公曰龜遭以
祭則凶以戰則勝武王從之卒克紂焉

又魯將伐越筮之得鼎折足子貢占之以爲凶何則鼎
而折足行用足故謂之凶孔子占之以爲吉曰越人水
居行用舟不用足故謂之吉魯伐越果克之

司馬季主爲賈宋導惑

司馬季主爲子陽導僊

史記宋忠賈誼游于十肆中與司馬季主往復季主曰
今夫十者導惑教愚也夫愚惑之人豈能以一言而知

之哉言不厭多故騏驎不能與罷驢爲駟而鳳凰不與燕雀爲群而賢者亦不與不肖者同列故君子處卑隱以辟衆自匿以辟倫微見德順以除群害以明天性助上養下多其功利不求尊譽公之等喁喁者也何知長者之道乎宋忠賈誼忽而自失芒乎無色悵然噤口不能言于是攝衣而起再拜而辭行洋洋也出市門僅能自上車伏軾低頭卒不能出氣

真誥黃子陽者魏人也少知長生之妙學道在博落山中九十餘年但食桃皮飲石中黃水後逢司馬季主季主以導仙八方與之遂以度世

于南陌上伺駕黑牛生

向西北行取乘黑牛人

魏志裴松之注中書今史紀玄龍管輅鄉里人云輅在田舍嘗候遠隣主人患數失火輅卜教使明日于南陌上伺當有一角巾諸生駕黑牛故車必引留爲設賓主此能消之卽從輅戒諸生有急求去不聽遂留當宿意大不安以爲圖已主人罷入生乃把刀出門倚兩薪積間側立假寐歟有一小物直來過前如獸手中持火以口吹之生驚舉刀砍正斷腰視之則狐自此主人不復有災 又華城門夫人者魏故司空涿郡盧公女也得疾連年不差華家時居西城下南纏里中三廐在其東南管輅卜當有師從東方來自言能治便聽使之必得

其力後無何有南征廐騶當充甲卒來詣盧公言能治女郎公卽表請留之專使其子將詣華氏療病初用散藥後復用丸治尋有效卽奏除騶名以補太醫

北史有東苑鄭氏執得讎人趙氏尅明晨會宗族當就墓所刑之趙氏求救於王早早爲占候并授以一符曰君今取還選取七人令一人爲行主者佩此符于鷄鳴時伏在仇家東南二里平坦當有十人相隨向西北行中有二人乘黑牛一黑牛最在前一黑牛應第七但捉取第七者將還事必無它趙氏從之果如其言乃是鄭氏男五父也諸子並爲其族所宗敬故和解二家趙氏竟免

東方朔射覆

管公明射覆

漢書東方朔待詔金馬門稍得親近上嘗使諸數家射覆置守宮孟下射之皆不能中朔自贊曰臣嘗受易請射之乃別著布卦而對曰臣以爲龍又無角謂之爲蛇又有足跂跂脉脉善緣壁是非守宮卽蜥蜴上曰善賜帛十疋復使射他物連中輒賜帛

魏志管輅字公明館陶令諸葛原遷新興太守輅往祖餞之賓客並會原自起取燕卵蠶窠鼃鼃著噐中使射覆卦成輅曰第一物含氣須變依乎宇堂雄雌以形翅翼舒張此燕卵也第二物家室倒懸門戶衆多藏精育

毒得秋乃化此蠶窠也第三物鰕鰾長足吐絲成羅尋網求食利在昏夜此黿鼉也舉坐驚喜平原太守劉邠取印囊及山鷄毛著器中使筮輅曰內方外圓五色成文含寶守信出則有章此印囊也高岳巖巖有鳥朱身羽翼玄黃鳴不失晨此山鷄毛也清河令徐季龍使人行獵令輅筮其所得輅曰當獲小獸復非食獸雖有爪牙微而不彊雖有文章蔚而不明非虎非雉其名曰狸獵人暮歸果如輅言季龍取十三種物著大篋中使輅射云器中籍籍有十三種物先說鷄子後道蠶蛹遂一一各之惟以梳爲枇耳

賜帛榜百
賞絹杖十

漢書東方朔射覆連中輒賜帛時有幸倡郭舍人滑稽不窮常侍左右曰朔狂幸中耳非至數也臣願令朔復射朔中之臣榜百不能中臣賜帛廼覆樹上寄生令朔射之朔曰是窠藪也舍人曰果知朔不能中也朔曰生肉爲膾乾肉爲脯著樹爲寄生盆下爲窠藪上令倡監榜舍人

北史吳遵世爲齊文襄墨曹參軍從遊山東有雲起恐雨廢射戲使筮遇剝李業興云坤上艮下剝艮爲山山出雲故知有雨遵世云坤爲地土制水故知無雨文襄使崔暹書之云遵世若著賞絹十疋不著罰杖十業興

若著無賞不著罰杖十業興曰同是著何獨無賞文襄曰遵世著會我意故賞須臾雲散二人各受賞罰

蔡鐵卜鼠

客師射鼠

述異記蔡鐵善卜劉義宣射得一白鼠置函中召鐵卜之笑曰兌色之鼠背明戶彎弧射之絕左股鼠孕三雄而兩雌若不見信剖腹而立知公乃使剖鼠腹皆如鐵言唐袁天綱子客師高宗置一鼠於匱令術家射之皆曰鼠客師曰雖實鼠然入則一出則四發之鼠生三子元里知主人果肴

趙達知主人酒脯

西京雜記元理善筭每主人果蓏肴藪悉知其所一日過友人陳廣漢廣漢爲之取酒鹿脯數片元理曰此資業之廣何供饋之偏耶廣漢慙曰有倉卒客無倉卒主人元理曰俎上蒸豚一頭厨中荔枝一棹皆可爲設廣漢再拜謝臯自入取之盡日爲歡

吳志趙達嘗過知故知故爲之具食食畢謂曰倉卒乏酒又無佳肴無以叙意如何達因取盤中隻箸再三縱橫之乃言卿東壁下有美酒一斛鹿肉三斤何以辭無時坐有他賓內得主人情主人慙曰以卿善射有無欲相試耳竟效如此遂出酒酣飲

知困米石數

知庭棗實數

西京雜記元理嘗從其友人陳廣漢廣漢曰吾有二困米
忘其石數子爲計之元理以食飭十餘轉曰東困七百四
十九石二升七合又十餘轉曰西困六百九十七石八斗
遂大署困門後出米西困六百九十七斗九升中有一鼠
大堪一升東困不差圭合元理後歲復過廣漢廣漢以米
數告之元理以手擊牀曰遂不知鼠之殊米不如剝面皮
北史綦毋懷文每云昔在晉陽爲監館館中有一蠕蠕
客同館胡沙門指語懷文云此人別有異美術仍指庭
中一棗樹云令其布筭子卽知其實數乃試之并辯若
干純赤若干赤白相半于是剝數之唯少一子筭者曰
必不少但更撼之果落一實

無用知之

不如不如

管輅別傳輅弟辰嘗欲從輅學卜及仰觀事輅言卿不
可教耳夫卜非至精不能見其數非至妙不能觀其道
孝經詩論足爲三公無用知之也于是遂止子弟無能
傳其術者

蜀志杜瓊爲人靜默少言閨門自守不與世事蔣琬費
禕等皆器重之雖學業入深初不觀天文有所論說後
進通儒譙周常問其意瓊荅曰欲明此術甚難須當身
視識其形色不可信人也晨夜苦劇然後知之復憂漏

泄不如不知是以不復視也

孫策殺于吉

孫權迎王表

搜神記孫策欲渡江襲許與于吉俱行時大旱所在燄厲策催諸將士使速引船或身自早出督切見將吏多在吉所策因此激怒言我爲不如于吉邪而先趨附之便使收吉至呵問之曰天旱不雨道塗艱澀不時得過故自早出而卿不同憂戚安坐船中作鬼物態敗吾部伍今當相除令人縛置地上暴之使請雨若能感天日中雨者當原赦不爾行誅俄而雲氣上蒸膚寸而合比至日中大雨摠至溪澗盈溢將士喜悅以爲吉必見原

並往慶慰策遂殺之將士哀惜共藏其尸天夜忽更興雲覆之明旦往視不知所在策旣殺于吉每獨坐彷彿見吉在左右意深惡之頗有失常後治創方差而引鏡自照見吉在鏡中顧而弗見如是再三因撲鏡大叫創皆崩裂須臾而死

吳志臨海羅陽縣有神自稱王表周旋民間語言飲食與人無異然不見其形又有一婢名紡績孫權遣中書郎李崇齋輔國將軍羅陽王印綬迎表表隨崇俱出與崇及所在郡守令長談論崇等無以易所歷山林輒遣婢與其神相聞秋七月崇與表至孫權于蒼龍門外爲立第舍數使近臣齋酒食往表說水旱小事往往有驗

馬志 卷十
及皇后潘氏薨諸將吏數詣王表請福表亡去 孫盛
曰盛聞國將興聽于民國將亡聽于神權年老志衰讒
臣在側廢適立庶以妾爲妻可謂多涼德矣而僞設符
命求福妖邪將亡之兆不亦顯乎

郭景純知命盡日中

皇甫玉知不過日午

晉書王敦將舉兵使郭璞筮之不吉敦大怒曰卿壽幾
何曰命盡今日日中敦怒收璞斬之

北史皇甫玉指文宣謂其妻曰殿上者不過二年妻以
告舍人斛斯洪慶妻洪慶以啓帝怒曰向婦女小兒評
論萬乘主敕召玉玉每照鏡自言兵死及被召謂妻曰

我今去不廻若過日午時當得活既至正中遂斬之

文摯怒齊王

華陀怒郡守

呂氏春秋齊王疾瘠使人之宋迎文摯文摯至視王之
疾謂太子曰王之疾必可已也雖然王之疾已則必殺
摯也太子曰何故文摯對曰非怒王則疾不可治怒王
則摯必死太子頓首彊請曰諾請以死爲王與太子期
而將往不當者三齊王固已怒矣文摯至不解履登牀
履王衣問王之疾王怒而不與言文摯因出辭以重怒
王王叱而起疾乃遂已王大怒不說將生烹文摯太子
與王后急爭之而不能得果以鼎生烹文摯爨之三日

三夜顏色不變文摯曰誠欲殺我則胡不覆之以絕陰陽之氣王使覆之文摯乃死

後漢華陀傳有一郡守篤病久陀以爲盛怒則差乃多受其貨而不加功無何棄去又畱書罵之太守果大怒令人追殺陀不及因瞋恚吐黑血數升而愈

扁鵲起虢太子

澄公起勒愛子

史記號太子死扁鵲至虢宮門下問中庶子喜方者曰太子何病國中治穰過於衆事中庶子曰太子病血氣不時交錯而不得泄暴發于外則爲中害精神不能正邪氣邪氣蓄積而不得泄是以陽緩而陰急故暴蹙而

死扁鵲曰其死何如時曰鷄鳴至今日收乎曰未也其死未能半日也言臣齊勃海秦越人也家在于鄭未嘗得望精光侍謁于前也聞太子不幸而死臣能生之以吾言爲不誠試入診太子嘗聞其耳鳴而鼻張循其兩股以至于陰當尚溫也中庶子聞扁鵲言目眩然而不瞋舌橋然而不下乃以扁鵲言入報虢君虢君聞之大驚出見扁鵲于中闕因噓唏服臆竄精泄橫流涕長潛忽忽承眵悲不能自止容貌變更扁鵲曰若太子病所謂尸蹙者也扁鵲乃使弟子子陽厲鍼砥石以取外三陽五會有間太子蘇乃使子豹爲五分之熨以八減之齊和煮之以更熨兩脇下太子起坐更適陰陽但服

湯二旬而復故故天下盡以扁鵲爲能生死人扁鵲曰越人非能生死人也此自當生者越人能使之起耳晉書石勒愛子斌暴病死將殯勒歎曰朕聞號太子死扁鵲能生之今可得效乎乃令告佛圖澄澄取楊枝沾水灑而呪之就執斌手曰可起矣因此遂蘇有頃平飲上池水盡見五臟癥結受青囊書遂洞五行天文

史記扁鵲少時爲人舍長舍客長桑君過扁鵲獨竒之常謹遇之長桑君亦知扁鵲非常人也出入十餘年乃呼扁鵲私坐間與語曰我有禁方年老欲傳與公公毋泄扁鵲曰敬諾乃出其懷中藥予扁鵲飲是以上池之水三十日當知物矣乃悉取禁方盡與扁鵲忽然不見殆非人也扁鵲以其言飲藥三十日視見垣一方人以此視病盡見五臟癥結特以診脈爲名耳

晉書有郭公者客居河東精于卜筮璞從之受業公以青囊中書九卷與之由是遂洞五行天文卜筮之術禳災轉福通致無方雖京房管輅不能過也郭璞門人趙載嘗竊青囊書未及讀而爲火所焚

斷截腸胃既而縫合

引出臟腑還內腹中

後漢華佗精于方藥處劑不過數種心識分銖不假稱量針灸不過數處裁七八九若疾發結于內針藥所不

能及者乃令先以酒服麻沸散既醉無所覺因剗破腹背抽割積聚若在腸胃則斷截漸洗除去疾穢既而縫合傳以神膏四五日創愈一月之間皆平復

晉書佛圖澄嘗齋時平旦至流水側從腹旁孔中引出五臟六腑洗之訖還內腹中

作湯二升再服

取蘇一升煮服

後漢書華佗傳廣陵太守陳登忽患胸中煩懣面赤不食佗脈之曰府君胃中有虫欲成内疽腥物所爲也卽作湯二升再服須臾吐出三升許虫頭赤而動半身猶是生魚膾所苦便愈佗曰此病後三朞當發遇良醫可

救登至期疾動時佗不在遂死

南史褚澄善醫術建元中爲吳郡太守百姓李道念以公事到郡澄見謂曰汝有重疾荅曰舊有冷疾至今五年衆醫不差澄爲診脈謂曰汝病非冷非熱當是食白瀹雞子過多所致今取蘇一升煮服之始一服乃吐出一物如升涎裹之動開看是雞雛羽翅爪距具足能行走澄曰此未盡更服所餘藥又吐得如向者鷄十三頭而病都差當時稱妙

華元化療咽塞

徐文伯療髮癥

後漢書華佗字元化嘗行道見有病咽塞者因語之曰

向來道隅有賣餅人萍蓬甚酸可取三升飲之病自當去卽如佗言立吐一蛇乃懸車而候佗時佗小兒戲于門中逆見自相謂曰客車邊有物必是逢我翁也及客進顧視壁北懸蛇以十數乃知其奇

南史宋明帝宮人患腰痛牽心每至輒氣欲絕衆醫以爲肉癥徐文伯曰此髮癥以油投之卽吐得物如髮稍引之長三尺頭已成蛇能動挂門上滴盡一髮而已病都差

華元化針死胎

徐文伯針雙胎

後漢書有李將軍者妻病呼佗視脈佗曰傷身而能不去將軍言間日實傷身胎已去矣佗曰按脈胎未去也將軍以爲不然妻稍差百餘日復動更呼佗佗曰胎理如前似兩胎先生者去血多故後兒不得出也胎既已死血脈不復歸必燥着母脊乃爲下針并令進湯婦因欲產而不通佗曰死胎枯燥勢不自生使人探之果得死胎人形可識但其色已黑

南史宋後廢帝出樂游苑門逢一婦人有娠帝亦善診之曰此腹是女也問徐文伯曰腹有二子一男一女左邊青黑形小于女帝性急便欲使剖文伯惻然曰刀斧恐其變異請針之立落便瀉足太陰補手陽明便應針而落兩兒相續出如其言

灌滿百斛

水澆盡百斛

華佗別傳有婦人長病經年世謂寒熱注病者冬十一月中佗令坐石槽中平旦用冷水汲灌云當滿百始七八灌會戰欲死灌者懼欲止佗令滿數將至八十灌熱氣乃蒸出囂囂高二三尺滿百灌佗乃使然火溫床厚覆良久汗洽出著粉汗燥便愈

南史直閣將軍房伯玉服五石散十許劑無益更患冷夏日常複衣徐嗣伯爲診之曰卿伏熱應須以水發之非冬月不可至十一月水雪大盛令二人夾捉伯玉解衣坐石取冷水從頭澆之盡二十斛伯玉口噤氣絕家人啼哭請止嗣伯遣人執杖防閣敢有諫者撻之又盡水百斛伯玉始能動而見背上彭彭有氣俄而起坐曰熱不可忍乞冷飲嗣伯以水與之一飲一升病都差自爾恒發熱冬月猶單禪衫體便肥壯

爲氣徙癰

作氣出鏃

南史薛伯宗善徙癰疽公孫泰患背伯宗爲氣封之徙置齋前柳樹上明旦癰消樹邊便起一瘤如拳大稍稍長二十餘日瘤大膿爛出黃赤汁斗餘樹爲之萎損又陳顯達與桂陽賊戰矢中左目而鏃不出地黃村潘嫗善禁先以釘釘柱嫗禹步作氣釘即出乃禁顯達目

中鏃出之

服雄黃吐誤食之髮

熏防風療不語之證

舊唐書時有尼明律年六十餘患心腹鼓脹身體羸瘦已經二年甄立言診脈曰其腹內有蟲當是誤食髮爲之耳因令服雄黃須臾吐一蛇如人手小指唯無眼燒之猶有髮氣其疾乃愈

又許胤宗初事陳爲新蔡王外兵參軍時柳太后病風不言名醫治皆不愈脈益沉而噤胤宗曰口不可下藥宜以湯氣熏之令藥入腠理周理即差乃造黃耆防風湯數十斛置于牀下氣如煙霧其夜便得語

誑語療疑病

權誑療眼花

北夢瑣言元頑博士話唐時中表間有一婦人從夫南中效官曾誤食一虫嘗疑之由是成疾頻療不損京城醫者忘其姓名知其所患乃謂主人姨姪中謹密者一人預戒之曰今以藥吐瀉但以盤盂盛之當吐之時但言有一小蝦蟇走去然不得令娘知之是誑語也其姪僕遵之此疾永除

又有一年少眼中常見一小鏡子醫工趙卿診之與少年期來晨以魚鱠奉候少年及期赴之延于閣子內且令從容俟客退後方得攀接俄而設臺于上施一甌芥

醋更無他味卿亦未出迨禺中久候不至少年饑甚且聞醋香不免輕啜之逡巡又啜之覺胸中豁然眼花不見因竭甌啜之趙卿探知方出少年以啜醋慙謝卿曰即君喫鱠太多醬醋只欲即君因饑以啜之果愈此疾烹鱗之會乃權誑請退謀餐

龍化為老翁求治

鬼請為芻人求療

山川紀異龍背生疽化老翁求治於孫登曰病痊當有報時天旱不數日果大雨大石上忽裂一井其水

湛然

南史徐秋夫仕至射陽令常夜有鬼呻聲甚悽愴秋夫問何須答曰姓某家在東陽患腰痛死雖為鬼痛猶難

忍請療之秋夫曰云何厝法鬼請為芻人按孔穴針之秋夫如言為灸四處又針肩井三處設祭埋之明日見一人謝恩忽然不見當世伏其通靈

治病龍

出懶龍

山川紀異湯陰西有真人社舊傳孫登寓此值旱眾禱于龍得雨將祭謝之登曰此病龍雨安能蘇禾稼弗信請嗅之水果腥穢龍時背生疽則登言化老翁求治曰病痊當有報不數日果大雨大石上忽裂一井其水湛然蓋龍穿此以報也

高僧傳什僧伽閑而宴息見神告曰天方亢陽百姓苗

死身胡藏其懶龍耶伽曰爲之奈何神曰若今夕旦小指出窻隙外其如人何伽依之其夜霆擊異常質明視指微有紅線脉焉

黥布刑而王

昭達眇而貴

史記黥布秦時爲布衣少年有客相之曰當刑而王及壯坐法黥布欣然笑曰人相我當刑而王幾是乎人有聞者共俳笑之及項王封諸將立布爲九江王

南史章昭達性倜儻輕財尚氣少時遇相者謂曰卿容貌甚善須小虧則當富貴梁大同中昭達爲東宮直後因醉墮馬鬚角小傷昭達喜之相者曰未也侯景之亂

之敬徙舍從寬深自附納之寬常甚病韓生養視如僕役恩深踰于骨肉後名聞于天下倪寬位至御史大夫州郡承旨召請擢用舉在本朝遂至太傅夫鉗徒許負及相鄧通倪寬之工可謂知命之工矣故知命之工察骨體之證睹富貴貧賤猶人見盤盂之器知所設用也善器必用貴人惡器必施賤者尊鼎不在陪厠之側瓠瓜不在堂殿之上明矣

衛仲卿以人奴而具封侯相
薛大鼎以人奴而具方岳相

漢書衛青字仲卿嘗從人至甘泉居室有一鉗徒相青曰貴人也官至封侯青笑曰人奴之生得無笞罵即足

矣安得封侯事乎

舊唐書初泗州刺史薛大鼎隋時嘗坐事沒爲奴貞觀初與數人詣乙弗弘禮大鼎次至弘禮曰君奴也欲何所相咸曰何以知之弘禮曰觀其頭目直是賤人但不知餘處何如耳大鼎有慚色乃解衣視之弘禮曰看君面不異前言占君自腰已下當爲方岳之任

折臂三公

折臂太守

晉書年祐傳有善相墓者言祐祖墓所有帝王氣若鑿之則無後祐遂鑿之相者見曰猶出折臂三公而祐竟墮馬折臂位至公而無子

昭達率鄉人援臺爲流矢所中眇其一目相者見之曰卿相善矣不久當富貴臺城陷昭達還鄉里與陳文帝游因結君臣分侯景平文帝爲吳興太守昭達杖策來謁文帝見之大喜委以將帥恩寵超于儕等

三君皆丞相

三人皆方伯

史記有善相工田文者與韋丞相賢魏丞相相邴丞相吉微賤時會于客家田文言曰今此三君者皆丞相也其後三人竟更相代爲丞相

南史沈攸之賤時與吳郡孫超之全景文共乘一小船出都三人共上引埭有一人止而相之曰君三人皆當

至方伯攸之曰豈有是事相者曰不驗便是相書悞耳
後攸之爲郢荆三州超之廣州刺史景文南豫州刺史
鉗徒相衛青貴至封侯

相工指倪寬秩至三公

論衡衛青父鄭季與陽信公主家僮衛媼通生青在建
章宮時鉗徒相之曰貴至封侯青曰人奴之道得不答
罵足矣安敢望封侯其後青爲軍吏戰數有功超封增
官遂爲大將軍封爲萬戶侯

又韓太傅爲諸生時借相工五十錢與之俱入壁雍之
中相壁雍弟子誰當貴者相工指倪寬曰彼生當貴秩
至三公韓生謝遣相工通刺倪寬結膠漆之交盡筋力

南史初劉之遴在荆府常寄居南郡忽夢前太守
謂曰卿後當爲折臂太守卽居此中之遴後牛奔墮車
折臂右手偏直不復得屈伸書則以手就筆歎曰豈黥
而王乎周捨嘗戲之曰雖復並坐可橫政恐陋巷無枕
後連相兩王再爲此郡

相裴冕以兵起得相

相呂誼須大驚得相

舊唐書裴冕爲祠部郎中知河西雷後在武威金梁鳳
謂冕曰玄象有變半年間有兵起郎中此時當得中丞
不拜中丞卽宰相不離天子左右大富貴冕曰公乃狂
言冕何至此梁鳳曰有一日向東京一日入西蜀一日

馬志 卷十
來向朔方此時公得相冕懼其言深謝絕之其後安祿山反南犯洛陽僭稱偽位哥舒翰東守潼關累月奏冕爲御史中丞追赴京冕又詰曰事驗矣冕又問三日之兆梁鳳曰東京日卽自磨滅蜀川日亦不能久此間日何轉分明不可說冕志之卽潼關失守玄宗幸蜀肅宗北如靈武冕會之勸成冊立改元爲至德元年冕果爲中書侍郎平章事

又金梁鳳在河隴謂呂諲曰判官骨相合得宰相須得一大驚怖卽得諲後至驛責讓驛長榜之驛吏武將性麤猛持弓矢突入射諲矢兩發幾中諲面諲踰牆得免以報梁鳳梁鳳曰此必入相逾年諲自黃門侍郎知政

摸人而知其相

摸書而知其字

北史皇甫玉善相術齊文宣故以巾祿其眼使歷摸諸人至文宣曰此最大達官於任城王曰當至丞相于常山長廣二王並曰亦貴至石動桶曰此弄癡人至二供膳曰正得好飲食而已

又盧太翼博綜群書其後目盲以手摸書而知其字

朱建平善相人

朱建平善相馬

魏志朱建平善相術于閭巷之間效驗非一太祖爲魏公聞之召爲郎文帝爲五官將坐上會之三十餘人文

帝問已年壽又令徧相衆賓建平曰將軍當壽八十至四十時當有小厄願謹護之謂夏侯威曰君四十九位爲州牧而當有厄厄若得過可年至七十致位公輔謂應璩曰君六十二位爲常伯而當有厄先此一年當獨見一白狗而旁人不見也謂曹彪曰君據藩國至五十七當厄于兵宜善防之初潁川荀攸鍾繇相與親善攸先亡子幼繇經紀其門戶欲嫁其妾與人書曰吾與公達曾共使朱建平相建平曰荀君雖少然當以後事付鍾君吾時啁之曰惟當嫁阿鶩耳何當此子竟遭隕沒戲言遂驗乎今欲嫁阿鶩使得善處追思建平之妙雖唐舉許負何以復加也文帝黃初七年年四十病困謂左右曰建平所言八十謂晝夜也吾其決矣頃之果崩夏侯威爲兗州刺史年四十九十二月上旬得疾念建平之言自分必死豫作遺令及送喪之備咸使素辦至下旬轉差垂以平復三十日日晏請紀綱大吏設酒曰吾所苦漸平明日鷄鳴年便五十建平之戒真必過矣威罷客之後合瞑疾動夜半遂卒璩六十一爲郎中直省內歛見白狗問之衆人悉無見者于是數聚會并急游觀田里飲宴自娛過期一年六十三卒曹彪封楚王年五十七坐與王凌通謀賜死

又朱建平善相馬文帝將出取馬外入建平道遇之語曰此馬之相今日死矣帝將乘馬馬惡衣香驚齧文帝

膝帝大怒即便殺之

相馬

相牛

呂覽古之善相馬者寒風是相口齒麻朝相頰子女厲相目衛忌相髭許鄙相腕投伐褐相胃脇管青相臍物疎悲相股腳秦牙相前贊君相後凡此十人者皆天下之良工也其所以相者不同以用見馬之一徵也而知節之高卑足之滑易材之堅脆能之長短非獨相馬然也人亦有徵

酉陽雜俎相牛法岐胡有壽膺臣欲廣毫筋欲橫蹄後筋也常有聲有黃也角冷有病旋毛在珠泉無壽睫亂

觸人銜鳥角偏妨主毛少骨多有力濁射前良牛也疎

肋難養

相印

相板 相笏

魏氏春秋云許允之出爲鎮北也喜謂其妻曰吾知免矣妻曰禍見於此何免之有允善相印將拜以印不善使更刻之如此者三允曰印雖始成而已被辱問送印者果懷之而墜之于廁相印書曰相印法本出陳長文長文以語韋仲將印工楊利從仲將受法以語許士宗利以法術占吉凶十可中八九仲將問長文從誰得法長文曰本出漢世有相印相笏經又有鷹經牛經馬經

印工宗養以法語程申伯是故有一十二家相法傳于世
南史庾道愍精於相板宋明帝時山陽王休祐屢以言
語忤顏見道愍託以已板爲他物令道愍占之道愍曰
此乃甚貴然使人多愆忤休祐以褚彥回詳密求換其
板他日彥回侍明帝自稱下官帝多忌甚不悅休祐具
以狀言帝意乃解 又蔡母珍之在西州時有一手板
相者云當貴每以此言動帝又圖黃門郎帝嘗問之曰
西州時手板何在珍之曰此是黃門手板官何須問
南部新書有李參軍者善相笏知休咎必驗呼爲李相
笏又有龍復本者無目凡有象簡竹笏以手捻之必知
官祿年壽

周宣相夢

趙直占夢

魏志周宣爲郡吏太守楊沛夢人曰八月一日曹公嘗
至必與君杖飲以藥酒使宣占之是時黃巾賊起宣對
曰夫杖起弱者藥治人病八月一日賊必除滅至期賊
果破 文帝問宣曰吾夢殿屋兩瓦墮地化爲雙鴛鴦
此何謂也宣對曰後宮當有暴死者帝曰吾詐卿耳宣
對曰夫夢者意耳苟以形言便占吉凶言未畢而黃門
令奏宮人相殺帝復問曰我昨夜夢青氣自地屬天宣
對曰天下有貴女子冤死是時帝已遣使賜甄后璽書
聞宣言而悔之遣人追賜者不及 帝復問曰吾夢摩

錢文欲令滅而更愈明此何謂邪宣悵然不對帝重問之宣對曰此自陛下家事雖意欲爾而太后不聽是以文欲滅而明耳時帝欲治弟植之罪偏于太后但加貶爵以宣爲中郎屬太史 嘗有問宣曰吾昨夜夢見芻狗其占何也宣答曰君欲得美食有頃出行果遇豐膳後又問宣曰昨夜復夢見芻狗何也宣曰君宜隨車折腳宜戒慎之頃之果如宣言後又問宣昨夜復夢見芻狗何也宣曰君家欲失火當善護之俄遂火起語宣曰前後三時皆不夢也聊試君耳何以皆驗邪宣曰此神靈動君使言故與真夢無異也又問宣三夢芻狗而其占不同何也宣曰芻狗者祭神之物故君始夢當得飲

食也祭祀即訖則芻狗爲車所轢故中夢當墮車折腳也芻狗既車轢之後必載以爲樵故後夢憂失火也

蜀志魏延夢頭上生角以問占夢趙直直詐延曰夫麒麟有角而不用此不戰而賊欲自破之象也退而告人曰角之爲字刀下用也刀下用刀其凶甚矣 蔣琬見推之後夜夢有一牛頭在門前流血滂沱意甚惡之呼問直直曰夫見血者事分明也牛角及臯公字之象君位必當至公大吉之徵也 蜀志注何祗嘗夢井中生乘以問直直曰乘非井中之物會當移植然乘字四十八君壽恐不過此祗笑言得此足矣後爲犍爲郡年四十八卒如直所言

射龍

屠龍

尸子韓雉見申羊于曾育龍飲于沂韓雉曰吾聞也出見虎搏之見龍射之今弗射是不得行吾聞也射之遂射之莊子朱汙漫學屠龍于支離盆單千金之家三年技成而無所用其巧

射梅

射蔗

南史柳惲嘗與瑯琊王瞻博射嫌其皮濶乃摘梅帖烏珠之上發必命中觀者驚駭

濟書宜都王鏗善射常以棚的大濶曰終日射候何難

之有乃取甘蔗插地百步射之十發十中

養由基射猿

養由基射蜻

呂覽荆三有神白猿王自射之則搏樹而嬉使養由基射之始調弓矯矢未發猿擁樹而號

尸子楚莊王命養由基射蜻蛉曰吾願生得養由基援

弓射之拂左翼

曹丕善左右射

董卓善左右射

典略文帝自叙曰尚書令荀彧奉使犒軍見余談論之末彧言聞君善左右射此實難能余言執事未覩夫項

發口縱俯馬蹄而仰月支也或喜笑曰乃爾余曰埒有常徑的有常所雖每發輒中非至妙也若馳平原赴豐草要狡獸截輕禽使弓不虛彎所中必洞斯則妙矣

魏志董卓有才武膂力少比雙帶兩韃左右馳射

二狐俱獲

雙鴈俱落

南史山強工騎射彎弓五石爲奏事中散從獻文獵方山有兩狐起于御前詔強射之百步內二狐俱獲

北史斛律光以庫直事文襄從出野見鴈雙飛來文襄使光馳射之以二矢俱落焉

二箭下雙鵠

一發貫二鵠

後魏秦王翰弟幹善弓馬以馳從明元于白登之東北有雙鵠飛鳴于上帝命左右射之莫能中鵠旋飛稍高幹以二箭下雙鵠

南史突厥攝固獨愛長孫晟每共游獵畱之竟歲嘗有二鵠飛而爭肉固以箭兩隻與晟請射取之晟馳往遇鵠相攫遂一發雙貫焉攝固喜命諸子弟貴人皆相親友冀昵近之以學彈射

見二鹿授箭

見雙鳬授弓

北史朱榮曾送臺使見二鹿授兆二箭令取供今食

遂構火以待之俄而北獲其一榮欲誇使人責兆不盡
取杖之五十 又尉遲綱嘗從周文北狩雲陽見五鹿
俱走綱獲其三

又賀拔勝從宴昆明池時有雙鳬游池上周文授弓矢
于勝曰不見公射久矣請以爲歡勝射之一發俱中因
拜曰使勝得奉神武以討不庭皆此類也 又魏孝武
卽位蠕蠕等諸蕃並遣使朝貢帝臨軒宴之有鴟飛鳴
于殿前帝素知竇熾善射因欲矜示遠人乃給熾御箭
兩隻命射之鴟乃應弦而落諸蕃人咸歎異焉帝大悅
落鵬都督

射鵬都將

北齊書斛律光嘗從世宗于洹橋校獵見一大鳥雲表
飛颺光引弓射之正中其頸此鳥形如車輪旋轉而下
至地乃大鵬也世宗取而觀之深壯異焉丞相屬邢子
高見而嘆曰此射鵬手也當時傳號落鵬都督

後魏書秦王翰弟幹善弓馬以騎從明元于白登之東
北有雙鵬飛鳴于上帝命左右射之莫能中鵬旋飛稍
高幹以二箭下雙鵬帝賜之御馬弓矢以旌其能軍中
于是號幹爲射鵬都將

畫維摩神光滿室

畫釋迦視之如生

尉遲偓金陵六朝記顧愷之于瓦官寺畫維摩神光滿

室累日方散

又王定之于白馬寺畫釋迦像視之如生

誤落筆因畫爲蠅

誤落墨因作駁牛

尉遲偓金陵六朝記曹不興赤烏元年游青溪見赤龍
凌波面而出乃走筆圖之藏于秘閣是歲大旱乃出龍
祭之則甘雨霽霈又爲吳王畫屏風誤落筆因畫爲蠅
吳王以袂拂之不去方悟焉又寫葛仙公真容世傳之
按吳錄云曹不興善畫權使畫屏風誤落筆點素因
就以作蠅既進御權以爲生蠅舉手彈之

又王致之爲桓溫畫扇悞落墨因作駁牛甚妙

宿其下十日

宿其傍三日

隋唐嘉話閻立本家代善畫至荊州張僧繇見之曰定
虛得名耳明日更往曰名下定無虛士坐卧觀之留宿
其下十日不能去

又率更令歐陽詢行見古碑索靖所書駐馬觀之良久
而去數百步復還下馬佇立疲則布毯坐觀因宿其傍
三日而後去

閻立本悔畫

陸鴻漸毀茶

舊唐書閻立本善圖畫工于寫古秦府十八學士圖及

貞觀中凌煙閣功臣圖並立本之跡也時人咸稱其妙
太宗嘗與侍臣學士泛舟于春苑池中有異鳥隨波容
與太宗擊賞數賜詔座者爲詠召立本令寫焉時閣外
傳呼云畫師閻立本時已爲主爵郎中奔走流汗俛伏
池側手揮丹粉瞻望座賓不勝媿赧退誠其子曰吾少
好讀書幸免面牆緣情染翰頗及儕流唯以丹青見知
躬廝役之務辱莫大焉汝宜深誠勿習此末伎立本爲
性所好欲罷不能也及爲右相與左相姜恪對掌樞密
恪既歷任將軍立功塞外立本唯善于圖畫非宰輔之
器故時人以千字文語曰左相宣威沙漠右相馳譽丹青
唐書陸羽字鴻漸性嗜茶著經三篇言茶之原之法之

具尤備天下益知飲茶矣時鬻茶者至陶羽形置湯突
間祀爲茶神有常伯熊者因羽論復廣著茶之功御史
大夫李季卿宣慰江南次臨淮知伯熊善煮茶召之伯
熊執器前季卿爲再舉杯至江南又有薦羽者召之羽
衣野服挈具而入季卿不爲禮羽愧之更著毀茶論其
後尚茶成風時回紇入朝始驅馬市茶

魏文帝善彈碁

王僧虔善累碁

博物志魏文帝善彈碁能用手巾角時有一書生又能
低頭以所着葛巾角擲碁世說曰彈碁始自魏宮內
妝奩戲也文帝于此技亦特好有客自云能帝使爲之

馬志
妙踰于帝

南史王僧虔累十二博碁既不墜落亦不重作

拾子如龍鳳形

下子成一首詩

酉陽雜俎晉鳩摩羅什與人碁拾敵死子空處如龍鳳形
或言王積薪對玄宗碁局畢悉持云云

碁天洞覽王勃圍碁率下四子成一首詩勃猶詫之向
人曰吾自奪造化雖一時之間百用亦可

捶鉤者非鉤無察

承蜩者唯蜩之知

莊子大馬之捶鉤者年八十矣而不失毫芒大馬曰子

巧與有道與曰臣有守也臣之年二十而好捶鉤于物
無視也非鉤無察也是用之者假不用者也以長得其
用而況乎無不用者乎物孰不資焉 注曰大馬大司
馬也江東三魏之間謂鍛爲捶鉤劍名

又仲尼適楚出于林中見痾僂者承蜩猶掇之也仲尼
曰子巧乎有道邪曰我有道也五六月累丸二而不墜
則失者錙銖累三而不墜則失者十一累五而不墜猶
掇之也吾處身也若厥株拘吾執臂也若槁木之枝雖
天地之大萬物之多而唯蜩翼之知吾不反不側不以
萬物易蜩之翼何爲而不得孔子顧謂弟子曰用志不
分乃疑于神其痾僂丈人之謂乎

偃師所造倡者

馬鈞所作木人

列子周穆王西巡狩越崑崙不至弇山反還未及中國道有獻工人名偃師穆王薦之問曰若有何能偃師曰臣唯命所試然臣已有所造願王先觀之穆王曰日以俱來吾與若俱觀之翌日偃師謁見王王薦之曰若與偕來者何人邪對曰臣之所造能倡者穆王驚視之趣步俯仰信人也巧夫領其頤則歌合律捧其手則舞應節千變萬化惟意所適王以爲實人也與盛姬內御並觀之技將終倡者瞬其目而招王之左右侍妾王大怒立欲誅偃師偃師大懼立刻散倡者以示王皆傳會董

木膠漆白黑丹青之所爲王諦料之內則肝膽心肺脾腎腸胃外則筋骨肢節皮毛齒髮皆假物也而無不畢具者合會復如初見王試廢其心則口不能言廢其肝則目不能視廢其腎則足不能步穆王始悅而歎曰人之巧乃可與造化者同功乎詔貳車載之以歸

魏志注人有上百戲者能設而不能動也帝以問馬鈞可動否對曰可動帝曰其巧可益否對曰可益受詔作之以大木彫構使其形若輪平地施之潛以水發焉設爲女樂舞象至今木人擊鼓吹簫作山岳使木人跳丸擲劍緣組倒立出入自在百官行署春磨鬪雞變巧百

端評曰倡者假矣誰知已之百戲九家盡假也木人幻矣誰知已之聲音笑貌悉幻也彼妄認四大爲自身

相六塵緣影爲自心相者
豈認幻化人亦真人邪

魯般刻木爲仙

魯般刻木爲鶴

西陽雜俎魯般燉煌人未詳年代巧倖造化嘗作木爲其父乘之至吳會吳人以爲妖殺之般怨吳人殺其父于肅州城南作一木仙人舉手指東南吳地大旱三年卜曰般所爲也于是賣物巨千謝之般爲斷其一手其月吳中大雨唐初工人尚祈禱其木仙述異記天姥山南峯昔魯般刻木爲鶴一飛七百里後放于北山西峯上漢武帝使人往取之遂飛上南峯往往天將雨則翼翅動搖若將飛奮

墨子爲爲一日而敗

公輸爲鶴三日不下

韓子墨子爲木爲三年而成蜚一日而敗弟子曰先生之巧至能使木爲飛墨子曰不如爲車輓者巧也用咫尺之木不費一日之事而引三十石之任致遠力多久于歲數今我爲爲三年成蜚一日而敗惠子聞之曰墨子大巧巧爲輓拙爲爲

墨子公輸子削竹木以爲雛成而飛之三日不下公輸子自以爲至巧子墨子謂公輸子曰子之爲雛也不如翟之爲車輓須臾斲三寸之木而任五十石之重故所爲巧利于人謂之巧不利于人謂之拙

三年而成楮葉

三年而成畫莢

列子宋人有爲其君以玉爲楮葉者三年而成鋒殺莖柯毫芒繁澤亂之楮葉中而不可別也此人遂以巧食宋國子列子聞之曰使天地之生物三年而成一葉則物之有葉者寡矣故聖人恃道化而不恃智巧

韓子客有爲周君畫莢者三年而成君觀之與繇莢者同狀周君大怒畫莢者曰築十版之牆鑿八尺之牖而以日始出時加之其上而觀周君爲之望見其狀盡成龍蛇禽獸車馬萬物之狀備具周君大悅畫莢之功非不微難也然其用與素繇莢同

羽人乘蠶舟

越王銅船

神人乘漆舟

廩君土船

拾遺記秦始皇好神仙有羽人乘蠶舟浮黑水而至者身長十丈編毛爲衣兩目如電方耳出于項間顏如童三秦記太虛山上有池神人常乘漆船于其內今有故漆船在焉

交州記安定縣有越王銅船潮退則見又陰雨日百姓樵採見銅船出水上

載記廩君之先五姓爭之乃以土爲船雕畫之而浮水中曰若其船浮存者以爲廩君務相船獨浮于是遂稱廩君乘其土船將其從卒當夷水而下

